

Акафист преподобным старцам Оптинымским

Память 24 (11) октября

Кондак 1

Избранным Богом от суетнаго мира, вам, о преподобнии отцы Оптиности, крест свой благоговейно подъемшим и Христу последовавшим верою, яко дерзновенным предстателем нашим пред Господем ныне усердное моление приносяще, с любовью взываем:

Радуйтесь, преподобнии отцы Оптиности, благодати старчества светильницы.

Икос 1

Ангельскаго иноческаго жития всем сердцем взыскавше, вся мирская пристрастия отвергосте, богомудрии, и во объятия Отча с любовью в обитель Оптину притекше, путем тесным и прискорбным до конца дней ваших шествовасте. Сего ради воспеваем сице:

Радуйтесь, на зов Господень радостно притекшии; радуйтесь, всем желанием Христу последовавшии. Радуйтесь, крест свой на рамо восприимшии; радуйтесь, паче Господа ничесоже возлюбившии. Радуйтесь, Христа ради всеконечно себя отвергшиися; радуйтесь, Царствия Божия блаженнии наследницы.

Радуйтесь, преподобнии отцы Оптиности, благодати старчества светильницы.

Кондак 2

Видевше сети диавольския, аки паучина в мире

распростертая, и во глубине сердец ваших восчувствовавше, яко от них человецы токмо смирением спасаются, себе самех в теплой молитве пред Господом повергосте, со умилением взывающе: Аллилуия.

Икос 2

Разумевше сердцем и умом, яко дела своими не оправдятся пред Богом всяк живый, и присно содержаще пред очесы вашими согрешения своя, токи слезныя, единому Господу зримыя, источати не престасте, покаяние души Ему приносяще, Егоже образ покажете нам, взывающим:

Радуйтесь, грехи своя неприкровенны прозревавши; радуйтесь, дар умиления и слез от Господа приявши. Радуйтесь, блаженство плача о гресех познавши; радуйтесь, неусыпающую скорбь о них стяжавши. Радуйтесь, покаяния на земли проповедницы; радуйтесь, на небеси ныне Господом утешаемии.

Радуйтесь, преподобнии отцы Оптинстии, благодати старчества светильницы.

Кондак 3

Силу искупительных страданий Христовых положисте, святии, яко нерушимую надежду спасения, себе самех худшими всех человек и никоеяже милости достойных помышляюще, и сего ради со многим смирением и благодарением присно вопиясте Богу: Аллилуия.

Икос 3

Имуще в сердцах своих божественный

смиреномудрия дар, истиннии ученицы Христа, смирившаго Себе даже до смерти крестныя, ни во что же вменисте вся подвиги и труды ваша. Возрастающим бо подвигом, сугубо возрасташе и смирение, емуже дивящися, глаголем:

Радуйтесь, послушанию и смирению Спасителем наученнии; радуйтесь, за смирение Господем Славы вознесеннии. Радуйтесь, безгневия и кротости смирением достигшии; радуйтесь, смирением и самоукорением покой душам обретшии. Радуйтесь, нищетою духовною обогатившиися избранницы; радуйтесь, ваше бо есть царствие небесное, нищим духом уготованное.

Радуйтесь, преподобнии отцы Оптинстии, благодати старчества светильницы.

Кондак 4

Бурю страстей, плотию и диаволом воздвигаемую, утоляюще, ум владыку над страстьми пагубными постнически постависте, мужески бо естество понудивше, потщастесь благодатию Божиею худшее покорити лучшему и плоть поработити духу, Подвигоположнику Христу пети не престающе: Аллилуия.

Икос 4

Слышавше глагол Господень, яко царствие небесное нудится и токмо нуждницы восхищают е, постом, бдением и молитвою непрестанно подвизастесь и плоть свою со страстьми и похотьми Христови распясте, уставы иноческия нерушимо соблюдше. Темже ублажаем вы:

Радуйтесь, благое иго Христово люботрудно понесшии; радуйтесь, трезвением сердечным духа не угасившии. Радуйтесь, крепкое хранение устом своим полагавшии; радуйтесь, тела своя нещадно утеснявшии. Радуйтесь, с телесными подвиги умное делание сочетавшии; радуйтесь, в терпении вашем души ваша стяжавшии.

Радуйтесь, преподобнии отцы Оптинстии, благодати старчества светильницы.

Кондак 5

Светоносное имя Иисусово, яко оружие непобедимое противу бесовския рати, непрестанно в сердце с верою носяще, приснотекущий источник благодати обретосте, восходяще от силы в силу и огонь ко огню прилагающе, очищенным смыслом воспевасте Богу: Аллилуия.

Икос 5

Прозревающе всечасно немощь свою и спасительную, благодатную силу молитвы Иисусовой, николиже престасте творити ю, страстей прилоги тою посецающе и вся козни вражия попадающе, в безмолвии сердца молитвенное собеседование с Господем таинственно обретше, нас научаете взывати вам:

Радуйтесь, весь ум свой в молитву погрузившии; радуйтесь, всецело горе сердца своя имевшии. Радуйтесь, на молитве ни о чемже суетнем помышлявшии; радуйтесь, имя Иисусово неусыпно призывавшии. Радуйтесь, молитвы сердечныя изряднии подвижницы; радуйтесь, вся просимая во имя Господне получавшии.

Радуйтесь, преподобнии отцы Оптинстии, благодати

старчества светильницы.

Кондак 6

Предстояще сердцем в молитве пред Крестом за грехи людския страждущаго Господа, рыданием возрыдасте, преподобнии, скорбию о гресех своих снедаеми и неизглаголанною любовию к Искупителю нашему возгарающесе, до конца жития убо трепетно взываєте Ему: Аллилуия.

Икос 6

Воссиявшу в сердцах ваших свету любве Божественныя, славу земную и похвалы возненавидесте и омерзисте, безчестие же от человеков и всякия скорби отверстым сердцем радостно приемлюще, поношению Христову усердно приобщистесь. Нам убо образ злострадания и терпения покажете, зовущим:

Радуйтесе, язвы Господа Иисуса Христа на теле своем носившии; радуйтесе, поругания, яко врачевство очистительное, усердно пившии. Радуйтесе, от почестей земных всем сердцем отвратившиися; радуйтесе, за ненавидящих вас с любовию молившиися. Радуйтесе, обидящих вас, яко благодетелей, возлюбившии; радуйтесе, благодарити милосердаго Господа николиже преставшии.

Радуйтесе, преподобнии отцы Оптинстии, благодати старчества светильницы.

Кондак 7

Хотяй Господь всем человеком спастися и в разум истины приити, видя ваше благое произволение и труд

непрестанный в исполнении заповедей Его, отверзе вам ум разумети пути Своя и оправданием Своим научи вас. Темже сердцем просвещенным выну воспевайте: Аллилуия.

Икос 7

Дивна дела Твоя, Господи, яко паче книжник вразумляеши рабов Твоих, всем сердцем взыскующих Тя, и открываеши очи их, да уразумеют чудеса от закона Твоего. Блажим бо преподобных Твоих, отцев наших Оптинских, присно поучавшихся в заповедех Твоих, яже возлюбиша зело, и поем им:

Радуйтесь, словеса Божия, яко богатство много, в сердце сокрывшии; радуйтесь, путие заповедей Божиих всем сердцем возлюбившии. Радуйтесь, всяк путь неправды омерзившии; радуйтесь, от пути Господня николиже отступившии. Радуйтесь, в добром подвиге уготовившиися и не смутившиися; радуйтесь, слово Божие вместивше, мир мног во Христе обретшии.

Радуйтесь, преподобнии отцы Оптинстии, благодати старчества светильницы.

Кондак 8

Странников и пришельцев на земли себе помышляюще, ничесоже от тленных вещей мира сего стяжати себе не возжеласте, да не будут сердца ваша к земли влекома, обаче к единому Богу прилепистесь, чисте возносяще Ему песнь: Аллилуия.

Икос 8

Всякое плотское пристрастие, от любви Господни отлучающее, вседушно отвергосте, единое на потребу

взыскующе. Всегда убо при ногу Иисусову неотторженною приседесте любовь, ко благом житейским сердца не прилагающе и все упование свое на Господа возложивше. Темже похваляем вас, святии:

Радуйтесь, без пристрастия к миру житие свое скончавшии; радуйтесь, от земных забот свободшеся, сладость чистыя молитвы познавшии. Радуйтесь, твердою верою попечения житейская отложившии; радуйтесь, нестяжанием и послушанием пагубныя страсти умертвившии. Радуйтесь, иноческий обет нестяжания свято соблюдшии; радуйтесь, волю свою отсекишии Христовы послушницы.

Радуйтесь, преподобнии отцы Оптинстии, благодати старчества светильницы.

Кондак 9

Вся молитвы ваша и вся силы ваша подвигоште, преподобнии, во еже стяжати чистоту душевную и телесную, без неяже никтоже узрит Бога; темже убо чистым сердцем сподобистеся в рай Господни достойно воспети чудную праведных песнь, зовуще: Аллилуия.

Икос 9

Воюющая на душу плотская вожделения постом и молитвою укрощающе, помыслом греховным возобладати вами не попускасте, от Господа Бога, единого власть имущаго побеждати естества чин, дар чистоты и целомудрия приясте. Приимите убо и от нас хваления таковая:

Радуйтесь, благодать Божию в борьбе с плотию смирением привлекшии; радуйтесь, труды и лишения возлюбивше, покой телесный отринувшии. Радуйтесь,

постом и всенощными молениями похоть плоти умертвившии; радуйтесь, естества уставы силою Христовою победившии. Радуйтесь, тела и души ваша чисты Господеви принесшии; радуйтесь, чистии сердцем, Бога в вечном блаженстве зрящи.

Радуйтесь, преподобнии отцы Оптинстии, благодати старчества светильницы.

Кондак 10

Спасти хотяще души своя для жизни вечныя, вся помышления о земнем и привременнем отринусте и Спасителю нашему, заповедь велику о любви учеником Своим давшему, делом и истиною последовасте. Сего ради ближних ваших теплою любовию тогда возлюбисте, Небесному Отцу всех человеков зовуще: Аллилуия.

Икос 10

Возлюбивше всею душею ближняго своего, Царствие Божие внутрь себе обретосте, темже сниде в сердца ваша огонь пополаяй любви Божия, еуже необыменно насыщающесе, всецело себе в жертву делом любви принесосте. Ныне же и от нас благоговейное пение сие слышите:

Радуйтесь, всех человеков святою любовию возлюбившии; радуйтесь, во еже некия спасти, всем вся бывшии. Радуйтесь, о горестех людских слезно воздыхавшии; радуйтесь, всех притекающих в сердца своих вмещавшии. Радуйтесь, тща от себе никогоже отпускавшии; радуйтесь, души ваша за ближних полагавшии.

Радуйтесь, преподобнии отцы Оптинстии, благодати

старчества светильницы.

Кондак 11

Пение молебное приносим вам, преподобнии отцы наши Оптинстии, вашею бо стезею воистину право ходити познахом. Блаженни есте, Христу работавшии и вражию посрамившии силу, истинное правило добродетели показастесья всем, Господеви зовущим: Аллилуия.

Икос 11

Светлыя подвиги ваша похваляюще, преподобнии отцы наши Оптинстии, ублажаем вас, яко славных наставников монахов и чудных собеседников Ангелов ныне на небеси Престолу Божию предстоящих и молящихся о нас, с любовью поющих вам:

Радуйтесь, трезвения непрестаннаго усерднии ревнителе; радуйтесь, пламени сердечнаго неусыпнии хранителе. Радуйтесь, непоколебимии столпи послушания, вся претерпевшии; радуйтесь, многими скорбьми в Царствие Божие вшедшии. Радуйтесь, иноческаго жития равноангельнии подвижницы; радуйтесь, добрии раби Божии, блазии и вернии.

Радуйтесь, преподобнии отцы Оптинстии, благодати старчества светильницы.

Кондак 12

Благодати дар испросити у Господа, о блаженнии, верно хвалящим вас молим. Вонмите воздыханием нашим, слез наших не презрите. Умолите Господа утолити лютыя страсти наша, дати нам плач сокрушенный о гресех наших, да чистою душею и

неоскверненными устнами купно с вами сподобимся в рай Господни воспевати: Аллилуия.

Икос 12

Поюще ныне вас, о преподобнии, хвалебными гласы, вемы, яко не пеняя устен взыскуете, но подвигом вашим последования, смирения сердечнаго и жития исправления. Темже в покаянии помощи вашае просяще, любовию же подвизаеми, глаголем:

Радуйтесь, добре жительствующих ограждающи;
радуйтесь, немощных и сирых укрепляющи.
Радуйтесь, падающим руку помощи простирающи;
радуйтесь, кающимся слезы утешительныя низпосылающи. Радуйтесь, всем призывающим вас скории помощницы; радуйтесь, спасения нашего пред Богом теплии ходатаи.

Радуйтесь, преподобнии отцы Оптинстии, благодати старчества светильницы.

Кондак 13

О преславнии угодницы Христовы, преподобнии отцы и старцы, Моисее, Антоние, Исаакие, Иларионе, Анатолие, Иосифе и вторый Исаакие, Льве, Макарие, Амвросие, Варсонофие, вторый Анатолие, Нектарие и Никоне, яко седмь столпов и седмь светильников в Оптинстей обители просиявшии: нынешнее наше моление услышите и испросите нам у Господа смирение и память смертную, да избавит нас Господь от всякаго зла и сподобит христианския кончины всех вопиющих Ему: Аллилуия, аллилуия, аллилуия.

(Этот кондак читается трижды, затем икос 1 и кондак 1)

Икос 1

Ангельскаго иноческаго жития всем сердцем
взыскавше, вся мирская пристрастия отвергосте,
богомудрии, и во объятия Отча с любовью в обитель
Оптину притекше, путем тесным и прискорбным до
конца дней ваших шествовасте. Сего ради воспеваем
сице:

Радуйтесь, на зов Господень радостно притекшии;
радуйтесь, всем желанием Христу последовавшии.
Радуйтесь, крест свой на рамо восприимшии;
радуйтесь, паче Господа ничесоже возлюбившии.
Радуйтесь, Христа ради всеконечно себя отвергшиися;
радуйтесь, Царствия Божия блаженнии наследницы.

Радуйтесь, преподобнии отцы Оптинстии, благодати
старчества светильницы.

Кондак 1

Избранным Богом от суетнаго мира, вам, о
преподобнии отцы Оптинстии, крест свой благоговейно
подъемшим и Христу последовавшим верою, яко
дерзновенным предстателем нашим пред Господем
ныне усердное моление приносяще, с любовью
взываем:

Радуйтесь, преподобнии отцы Оптинстии, благодати
старчества светильницы.

Молитва

Божественный сонме преподобных отец, богоноснии
старцы Оптинстии, ангельским житием на земли
просиявшии и в небесном граде прославленнии! Вемы,
яко во дни земнаго служения вашего никто же тощ и
неутешен от вас отыде, но всем вся бысте: болящим

целителие, сомнящимся утверждение, печальным утешителие, яко благодать исцеления, прозрения, немощных душ врачевания обильна в вас явися. Но и ныне всем нам есте предстателие, и о страждущем Отечестве нашем приснии пред престолом Божиим печальницы, вам бо дадеся благодать еже за ны молитися. Призрите убо от горния славы и видите стадо ваше, еже пасли есте на пажити учения Христова, яко смятено есть и повержено, и от волков душетленных расхищаемо. Посетите нас, немощных и беспомощных, благосердием вашим, заблудшия взыщите, расточенныя соберите, прельщенныя обратите и совоюпите Святей, Соборней и Апостольстей Церкви; яже во иночестем житии оградите от всех навет вражиих, юность вразумите, старость поддержите, супружества в мире и единомыслии соблюдите. Услышите нас, душ божественнии врачеве, и наставите на путь покаяния, да последующе словесем вашим, возложим себе и живот наш в руце превеликаго милосердия Божия, да руководит воля Его нашими мыслями и чувствами во всех делах и словесех наших. Прострите нам руку помощи, отцы всеблаженнии, и научите нас молитися, веровати, уповати, терпети, прощати и любити, да тако в заповедех Господних присно ходяще, сподобимся ходатайством вашим вечныя радости Царствия Небеснаго, идеже вкупе с вами прославим Бога, дивнаго во святых Своих, Отца и Сына, и Святаго Духа, во веки. Аминь.